

Parlamentuaren erabakiak lotesleak dira Euskalerria Irratiaren aburuz

Banaketa prozesua garbia izan dela erratea «iritzi merkea» dela diote irratikoek

Erredakzioa / Iruñea

FMko irratia lizentzia banaketaren inguruko batzorde parlamentarioaren emaitza eta Nafarroako Parlamentuak Gobernuari egin zion eskaera aztertu zituzten atzo Iruñeko Euskalerria Irratikoek. Haien aburuz, Gobernuak kasu egin behar lioke Parlamentuaren eskaerari, «demokrazia parlamentarioan Legebiltzarraren erabakia lotesle delako demokraten-dako».

IRRATI lizentzien banaketa errepikatzeko eta prozesua bideratu zuten agintari politikoak kaleratzeko eskatu zion Nafarroako Parlamentuak Gobernuari joan den astean. Horren inguruan, hauxe erran zuten Iruñeko Euskalerria Irratikoek atzo: «Erakundeetatik egurra hartzera ohi-tuta egonik, oso pozgarria da Legebiltzarra mintzatu den bezain garbi mintzatu izana. Gure arrazoiak baliozkoak zirela eta direla erakutsi da». Iruñeko Komunikabideak enpresako ordezkari Eugenio Arraiza eta Euskalerria Irratiko zuzendari Mikel Bujanda izan ziren azalpenak ematen.

Euskalerria Irratikoen aburuz, batzordearen emaitza «egiazki gertatu denaren aitormena da». Hala ere, zehaztu zuten, «batzordekoek



Mikel Bujanda, irratiko zuzendaria, eta Eugenio Arraiza, Iruñeko Komunikabideak enpresako ordezkaria.

erraza zuten, guzia idatzirik zegoelako. Baina eusten jakin dute, batzordekideen aurka izan diren trabak eta deskalifikazioak latzak izan baitira. Ez dira kikildu. Lana xehe-mehe egin dute eta eskertzekoa da arreta eta denbora eskaini izana».

Banaketaren inguruan batzordeak ondorioztatu duena «ezin biribilagoa» da. Ondoren, Parlamentuak eskatu du baliorik gabe geldidadila lehiaketaren emaitza, eta egindakoaren erantzule

direnek kargua gal dezatela. «Horrela mintzatu dena Legebiltzarra da», adierazi zuten. «Ez da iritzi bat, hori baino gehiago da: pronuntziamentua da, agindua». Horren parean, UPNk erran zuen baimenen banaketa prozesua garbia eta legezkoa izan zela. «Hori bai iritzi merkea, oinarririk gabea, egiaztatu ezin dena, egia ez delako».

Iruñeko irratia euskaldun bakarraren sustatzaileendako, UPNk ez du onartu nafar gizartearen ordezkariak

agindu diona. «Gure ustez demokrazia parlamentarioan Legebiltzarraren aginduak binkulanteak dira, lotesleak dira demokratendako. Une horietan nor bakoitzak egiten du bere buruaren erretratua». Euren ustetan, euskarari dion gorroto eta beldurratik utzi zuen UPNk Euskalerria Irratia lizentziarik gabe.

Azkenik, adierazi zuten lanean jarraituko dutela, batetik, legeztapenaren alde, baina batik bat, eguneroko jardunean.

Ipar Euskal Herriko AEK taldeak Korrikaren balantze baikorra egin du

■ Euskararen legezko onarpena «sekulan baino beharrezkoago da»

Lutxi Fourcade / Baiona

11. KORRIKARI buruzko balantze baikorra egin zuen Ipar Euskal Herriko AEK taldeak. Parte hartze benetan handia izan da herri guztietan. «Azpimarratzekoa da Korrika gauaz iragan den herrietan lasterkari multzo ederrak ikusi ditugula», azaldu zuten taldeak.

Korrikak izan dituen berrikuntzak ere arrakastatsuak izan dira. Euskararen alde hartu diren en-gaiamenduak arlo guztietakoak eta anitz izan dira. Orotara 83 izan dira, hala nola elkarteak, dantza taldeak, kirol taldeak, besta komiteak eta herriko etxeak.

Elkarteak adierazi zue-nez, bestalde, 233 elkarte parte hartu dute aurtengo Korrikan, 35 sozio-ekonomia alorreko taldek, 30 eskola, ikastola eta ikastetxetako ikasle eta irakasle, eta 23 Herriko Etxeren ordezkariak (haien artean sei auzapez).

Diru bilketaren aldetik, aurrekontua orokorra da eta Ipar Euskal Herriari doakion etekina beranduago ezagutuko da. «Hala ere, erran dezakegu alde horetatik Korrika 11k bere helburua bete duela», azpimarratu zuten taldeak.

Itsuek euskaraz bizitzeko dituzten eragozpenak salatu ditu EHEk

■ Dituzten baliabideak erabiltzea galdatu diete erakundeei eta ONCERI

I. Olabarri / Bilbo


EUSKARAK berez bizi duen egoerari itsuek pairatzen duten bazterkeria gehitu behar zaio, ONCE Espainiako Itsuen Erakunde Nazional-eko langile Manu Agirrek atzo Bilbon esan zuenez. Euskal Herrian Euskarazek (EHE) itsuek euskaraz bizitzeko orduan dituzten arazoak salatze-ko deitu zuen prentsaurrekoan egin zituen adierazpen horiek Agirrek. «Itsuek ez dugu euskaraz irakurtzeko, euskaraz ikasteko eta euskaraz informazioa jasotzeko eskubiderik», salatu zuen.

Erakunde publikoekin eta ONCEREkin ere bilerak egin badituzte ere, egoerak ez duela aurrera egiten nabarmendu zuten Manu Agirrek eta Mertxe Sanchezek. Arrazoiak erakunde publikoek eta ONCEk gai horren inguruan duten utzikeria litzateke. «Baliabide ekonomikoak eta humanoak badituzte; izan ere, beste hizkuntza batzuetan —katalanez, galegoz, frantsesez eta gaztelaniaz—, neurri txikian bada ere, badago irakurtzeko eta informazioa jasotzeko aukera itsuentzat. Baina euskararekin ez du halako jarrerarik izan ONCEk».

Iaz Elkar argitaletxeak eta ONCEk euskal autoreen liburuak Braillera aldatzeko hitzarmena sinatu zutela gogorarazi zuen Manu Agirrek. Elkarrek liburuak ONCEn esku utzi ditu euskarri informatikoan, eta, ONCEk arazorik ez duen arren, haiek Brailleratzeko ez duela ezer egin salatu zuen Manu Agirrek: «Oraindik ez dute liburu bakar bat ere argitara eman».

Balibideak erabili

Baliabideak badaudela eta haiek aprobetxatzeko eskatu zuten, horrenbestez. «Ez



EHEko Koldo Rodriguez, Manu Agirre eta Mertxe Sanchez, atzo.

dugu eskatzen guretzako garestia izango den erakunde berri bat sortzea. Eskatzen dugun bakarra da dau-den baliabideak erabil ditza-tela itsu euskaldunek euskaraz ikasteko aukera izan dezagun».

Euskarak Euskal Herrian ez du benetako ofizialtasunik, EHEko Koldo Rodriguezek salatu zuenez. Euskara erabiltzen dutenen bazterkeria badagoela eta administrazioak horretan arduragabe jokatzen duela esan zuen.